

Veneris & Mercurij quadratus, quanquam raro contingat, subtilis magisterij artificem, & hominem clarum facit, aut alicuius magnę disciplinę magistrum, sed foeminarum aut mulierum causa infamem reddit.

Veneris quadratus ad Lunam, si Luna superiorem possederit locum, & Venerem in sinistro positam uiderit, maxima diuitiarum lucra, sed à foeminis damna portendit, aut infamiam. At si Venus superior fuerit, maxima foelicitate beat natus, prosperitate in rebus agendis uitam decorat, & facto uxoris amorem reddit inuolatum, filios largitur bonos, & plena leticię commoda, sermonis facundiam, gratiamq; sed adulteras matres, honestas, & morigeras natus fortietur uxores.

Mercurij & Lunę quadratus, si Mercurius superior fuerit, sapientię ornamenta, facundiam, sed ex populari seditione discrimen quandoq; largitur, quem si male aspexerint stellę infoelices, & Luna ex oppposito Martem, aut Tetragono aspexerit, metuendum falsitatis crimen infligit, & comprehendi, aut in custodia poni, aut in carceres detrudi publicos, in uinculisq; teneri facit. Si autem Luna superior fuerit, erunt instabiles, ita ut consilia animi saepe peruertant.

De oppositione Saturni, & aliorum;



Saturnus & Iupiter oppositi, exitia rerum agendarum multa decernunt, filiorumq; casus acerbos. Quod si Saturnus in Horoscopo sit, & Iupiter in occasu, post grauiam iuuentutis incommoda, uitę finis cum prosperitate succedet, & commodis.

Saturni & Martis oppositus, grauiam periculorum discrimina, populares seditiones, & grauiam uitę pericula semper infligit, uulnera aut malę mortis exitium saepe minatur, multas adducit sollicitudines, & malis facit contrarietatibus implicari assiduis ægreditudinibus, & grauibus implicat laboribus, & domesticarum inimicitiarum decernit incommoda, crebras seditionum tempestates apportat, & patrem eius aut cita morte prosternit, aut grauibus implicat ægreditudinibus. At si in aquosis signis alter horum fuerit, grauibus submersos procellis, naufragos reddit, aut maligno humore concreta pestis fortes infligit calamitates. Si autem de duobus alter in ferino signo fuerit, à quadrupedibus, uel feris uitę periculum afferet, aut ueneno occidet. Si autem in signo quadrupedum animalium alter eorum fuerit, non ferino, natus graui ruinae pondere perimet, quę fortiora erunt, si Iupiter eos non aspexerit. Quod si Luna in cardinibus posita ex quadrato respexerit hos, hæc grauiora contingent. Exilia enim crebra minatur, & publica supplicia. At si in quinta, undecima, nona, uel tertia constituti, diametraliter se aspexerint, omnia prospere foelicitatis incrementa restringunt. Et hæc infortunia medio uitę tempore conualescunt. Si uero in deiectis aut pigris locis constituti fuerint, minus nocebunt, sed dolores, & egestates adducent. Quę omnia Iouis aut Veneris prosperis radiationibus mitigantur, aut ferè tolluntur.

Oppositus Saturni ad Solem, si Iupiter non bene aspexerit, aut nato aut patri laboriosę uitę pondus imponit, angustiasq; diurnas decernit, nonnullas aduersas valetudines inducit, & malę mortis exitium, substantiamq; dissipat, quę grauiora erunt in nocte, & in foemininis signis.

Diameter Saturni & Veneris, fornicatorem natus fore significat, & non daturum uxorem, quam si forte acceperit, aut degenerem, aut meretricem accipiet, aut infamem, & denegat omnem Venereę gratię uenustatem.

Diameter Saturni & Mercurij, linguę & sermonis impedimenta decernit. At si alter eorum in signis mutis fuerit, mutos indicat fore natos. Quod si Luna

cum